



SAMBAND ÍSLENSKRA SVEITARFÉLAGA

Alþingi
b.t. umhverfis- og samgöngunefndar
Austurstræti 8-10
150 Reykjavík

Reykjavík 18. desember 2017
1711005SA GB
Málalykill: oo.64

Efni: Umsögn um frv. um br. á l. um snjóflóð og skriðuföll, 5. mál

Samband íslenskra sveitarfélaga vill koma að eftirfarandi athugasemdum við frv. sem umhverfis- og samgöngunefnd fjallar um á fundi sínum í dag.

Sambandið styður að frumvarpið verði að lögum en telur mikilvægt að í nefndaráliti frá umhverfis- og samgöngunefnd komi fram skýr vilji til þess að mæta þeim sjónarmiðum sem sambandið hefur lagt áherslu á í umsögn til umhverfis- og auðlindaráðuneytisins. Þau sjónarmið eru rakin í 5. kafla í skýringum með frumvarpinu:

Í umsögn Sambands íslenskra sveitarfélaga, dags. 16. nóvember sl., segir að með frumvarpinu sé lagt til að ráðstafa tímabundið hluta af fjárheimildum ofanflóðasjóðs til gerðar hættumats næstu fimm árin. Með því sé skert geta ofanflóðasjóðs til þess að fjármagna meginverkefni sjóðsins, sem sé þátttaka í kostnaði við gerð varna gegn ofanflóðum. Fyrir liggi að ráðstöfunarfé ofanflóðasjóðs síðustu ár hafi verið innan við helmingur af mörkuðum tekjum sjóðsins, þ.e. gjald sem lagt sé á allar brunatryggðar húseignir. Jafnframt kemur fram í umsögninni að Sambandið leggist ekki gegn því að sú tímabundna heimild sem lögð sé til í frumvarpinu verði veitt og að hættumat verði fjármagnað með hluta af því gjaldi sem rennur til ofanflóðasjóðs. Sú afstaða sé þó með þeim fyrirvara að jafnhliða verði tekin ákvörðun um að hækka árlega fjárheimild ofanflóðasjóðs, helst umtalsvert. Eftir efnahagshrunið árið 2008 hafi ekki verið annað hægt en að sýna því skilning að ríki drægi tímabundið úr stuðningi við ofanflóðavarnir. Nú, tæpum áratug síðar, sé kominn tími til þess að endurskoða fjárheimildir sjóðsins með hliðsjón af þeim innviðaverkefnum sem bíða aðkomu sjóðsins.


Við framangreint má einnig bæta að fram hafa komið óskir um að hlutverk ofanflóðasjóðs verði útvíkkað, þannig að hann komi m.a. einnig að því að styrkja sjóvarnargarða sem ekki falla undir að vera hafnarmannvirki.

Með vísan til framangreindra sjónarmiða leggur sambandið áherslu á að til grundvallar við ákvarðanir um framlög ríkisins til ofanflóðasjóðs, samkvæmt fjármálaáætlun og fjárlögum hvers árs, liggi áætlanir um nauðsynlegar framkvæmdir á a.m.k. næstu fimm árum. Fjárheimildir taki jafnframt mið af því hvaða önnur verkefni sjóðnum er ætlað að fjármagna á hverjum tíma.

Sambandið væntir þess að umhverfis- og samgöngunefnd geti tekið undir þessa afstöðu sambandsins og þá jafnframt beint því til fjárlaganefndar og umhverfis- og auðlindaráðuneytisins að unnið verði á framangreindum grundvelli við ákvarðanir um fjárheimildir ofanflóðasjóðs á næstu árum.



Virðingarfullst
SAMBAND ÍSLENSKRA SVEITARFÉLAGA



Karl Björnsson
framkvæmdastjóri